

REGLUGERÐ

um fullvirðisrétt til framleiðslu sauðfjárafurða verðlagsárið 1989-1990.

I. KAFLI

Orðaskýringar.

1. gr.

Merking orða í reglugerð þessari er sem hér segir:

Framleiðandi er hver sá, sem á eigin vegum hefur með höndum búvöruframleiðslu til afhendingar í afurðastöð, hvort sem er einstaklingur, lögaðili, aðili að félagsbúi eða ríkisbú.

Búmark er viðmiðunartala afurðaeininga reiknuð í ærgildum, sem ákveðin er fyrir lögbýli eða framleiðendur búvöru utan lögbýla skv. reglugerð nr. 305/1988.

Ærgildisafurð er afurðaeining. Ein ærgildisafurð telst vera 18,2 kg af kindakjöti og tilsvaramagn af slátri og gærum.

Lögbýli eða jörð er í reglugerð þessari skilgreint skv. 1. gr. ábúðarlaga nr. 64 31. maí 1976 með síðari breytingum.

Félagsbú er sameiginlegur búrekstur tveggja eða fleiri einstaklinga á einu eða fleiri lögbýlum með samningi, sem hlotið hefur samþykki landbúnaðarráðuneytis, sbr. jarðalög nr. 65/1976 með síðari breytingum.

Fullvirðisréttur er það magn sauðfjárafurða, sem búmarkssvæði og/eða framleiðendum er ábyrgt fullt verð fyrir á grundvelli samnings skv. a-lið 30. gr. l. nr. 46/1985.

Fullvirðismark er samanlagður fullvirðisréttur allra framleiðenda á búmarkssvæði til framleiðslu sauðfjárafurða, reiknaður sem hlutfall af samanlögðu búmarki svæðisins í sauðfé.

II. KAFLI

Um fullvirðisrétt til framleiðslu sauðfjárafurða.

2. gr.

Búmarkssvæði vegna framleiðslu sauðfjárafurða skulu vera hin sömu og ákveðin voru með reglugerð nr. 305/1988. Landbúnaðarráðherra er heimilt að sameina búmarkssvæði innan búnaðarsambands svæðis, ef hlutaðeigandi búnaðarsamband óskar þess fyrir 1. október 1988.

3. gr.

Fullvirðisréttur einstakra framleiðenda til framleiðslu sauðfjárafurða á verðlagsárinu 1989/1990 skal vera hinn sami og þeim var ákveðinn með reglugerð nr. 443/1987 um fullvirðisrétt til framleiðslu sauðfjárafurða verðlagsárið 1988/1989 með eftirfarandi frávikum:

a) Með sérstökum rökstuðningi getur búnaðarsamband óskað leyfis landbúnaðarráðherra til endurúthlutunar á þeim fullvirðisrétti sem ákveðinn var samkv. 4. gr. rg. 443/1987, að hluta eða öllu leyti.

Umsókn ásamt rökstuðningi skal hafa borist Framleiðsluráði landbúnaðarins fyrir 1. október 1988.

b) Niður fellur fullvirðisréttur til framleiðslu sauðfjárafurða, sem seldur hefur verið Framleiðnisjóði landbúnaðarins, sbr. reglugerð nr. 406/1986.

c) Hafi framleiðandi gert samning við Framleiðnisjóð landbúnaðarins um leigu fullvirðisréttar, er ekki heimilt að nýta réttinn með innleggi sauðfjárafurða á verðlagsárinu.

d) Breytingum sem verða kunna á fullvirðisrétti til framleiðslu sauðfjárafurða skv. 1. mgr. 13. gr. rg. nr. 305/1988.

4. gr.

Fullvirðisrétti samkvæmt a. lið 3. gr. er viðkomandi búnaðarsambandi heimilt að ráðstafa til framleiðenda sem um það sækja og uppfylla einhver eftirtalinnu skilyrða:

1. Framleiðendur sem orðið hafa fyrir einstaklingsbundnum áföllum í sauðfjárrækt, svo sem vegna sauðfjársjúkdóma og annarra orsaka, þannig að innlegg þeirra á verðlagsárunum 1984/1985 og 1985/1986 eftir ásettan fjárstofn telst vera óeðlilega lítið miðað við afurðir næstu tvö verðlagsár á undan.
2. Framleiðendur sem framleiddu minna en 400 ærgildisafurðir mjólkur og sauðfjárafurða verðlagsárið 1985/1986 og höfðu meirihluta tekna sinna af mjólkurframleiðslu og sauðfjárrækt skv. síðasta skattframtali.
3. Framleiðendur sem tekið hafa í notkun ný fjárhús og/eða hlöður, stækkað fjárhús eða endurnýjað að meirihluta eftir 1. september 1983 eða hafa stofnað til félagsbús eftir 1. janúar 1983.
4. Framleiðendur sem teljast frumbýlingar, þ.e. hafa hafið búskap eftir 1. janúar 1983.

Umsókn stuðul í öðfestum upplýsingum um búskaparastöðu, skal senda viðkomandi búnaðarsambandi fyrir 1. október 1988. Búnaðarsamband tilkynnir umsækjendum og Framleiðsluráði landbúnaðarins afgreiðslu umsókna fyrir 15. október 1988. Óheimilt er að rýmka fullvirðisrétt skv. þessari grein umfram búmark hlutaðeigandi býlis til framleiðslu sauðfjárafurða.

Búnaðarsambandi er heimilt að fela Framleiðsluráði landbúnaðarins að annast fyrir sína hönd framangreinda ráðstöfun á grundvelli tillagna, sem sambandið gerir til ráðsins.

5. gr.

Nú eru líflömb seld af búmarkssvæði vegna fjárskipta með samningum við sauðfjársjúkdómanefnd. Er þá Framleiðsluráði landbúnaðarins skylt að meta hin seldu líflömb til jafngildis fullvirðisréttar og fara með samkvæmt eftirfarandi reglum:

Jafngildi fullvirðisréttar er fundið sem þungi seldra líflamba x 0,4. Frá fullvirðisrétti framleiðanda, sbr. 3. og 4. gr., sem selt hefur líflömb, skal draga fullvirðisrétt er jafngildir reiknuðum fallþunga hinna seldu líflamba.

Sá fullvirðisréttur sem einstökum svæðum skapast sameiginlega vegna þessa skal nýtast þannig:

Viðkomandi svæði fær til ráðstöfunar sem nemur allt að 3% af fullvirðisrétti svæðisins og skal því ráðstafað samkvæmt 1.-4. tl. 4. gr. enda leiði sú ráðstöfun ekki til þess að framleiðendur fái greitt fyrir ónotaðan fullvirðisrétt. Eftirstöðvar sem verða kunna, komi til að mæta fullvirðisrétti skv. 4. mgr. 2. gr. rg. nr. 157/1987.

Sauðfjársjúkdómanefnd skal tilkynna framleiðsluráði og hlutaðeigandi búnaðarsambandi um sölu líflamba á búmarkssvæðinu vegna fjárskipta fyrir 1. nóvember 1989. Framleiðsluráð reiknar út og tilkynnir búnaðarsambandi og framleiðendum jafngildi hinna seldu líflamba í fullvirðisrétti fyrir 10. nóvember 1989.

6. gr.

Framleiðanda er heimilt með samkomulagi við hlutaðeigandi afurðastöð að nýta allt að 5% af fullvirðisrétti sínum verðlagsárið 1990/1991 með innleggi á verðlagsárinu 1989/1990. Í samkomulagi þessu skal m.a. taka fram um greiðslu þessara afurða, sbr. 2. mgr. 29. gr. l. nr. 46/1985.

Nýti framleiðandi ekki allan fullvirðisrétt sinn skv. 3. og 4. gr., greiðir ríkissjóður fyrir hinn ónýtta fullvirðisrétt allt að 10% fullvirðisréttar hans. Greiðslan skal svara til hlutfalls launa og fjármagnskostnaðar í grundvallarverði sauðfjárafurða 1. september 1989. Framleiðsluráð landbúnaðarins annast greiðslu þessa skv. nánari reglum, er landbúnaðarráðherra setur. Með sama hætti getur framleiðandi óskað eftir slíkri greiðslu fyrir herra hlutfall ónýttis fullvirðisréttar enda berist Framleiðsluráði landbúnaðarins umsókn hans um það fyrir 1. júní 1989. Þó verður ekki greitt fyrir ónotaðan rétt, ef framleiðsla á árinu nær ekki 50% af

fullvirðisrétti viðkomandi býlis. Heimilt er að greiða þeim framleiðendum, sem förguðu fé vegna fjárskipta að opinberum fyrirmælum og hófu fjárbúskap á ný árin 1986-1988, fyrir ónotaðan fullvirðisrétt þó að framleiðsla þeirra sé innan við 50% af fullvirðisrétti. Greiðsla til þeirra verði þó að hámarki fyrir 50% af fullvirðisrétti viðkomandi býlis.

Í stað greiðslu fyrir ónotaðan fullvirðisrétt er framleiðanda heimilt að geyma fullvirðisrétt vegna innleggs á tímabilinu frá 1. desember 1989 til 1. júní 1990, enda hafi hann tilkynnt það Framleiðsluráði landbúnaðarins fyrir 15. nóvember 1988 og gert staðfest samkomulag við afurðastöð um slátrun.

Nýti framleiðandi ekki fullvirðisrétt sinn samkvæmt reglum 2. og 3. mgr. þessarar greinar, skal hinum ónýtta fullvirðisrétti ráðstafað þannig á meðan endist:

- a) til þeirra framleiðenda á búmarkssvæðinu er fengu fullvirðisrétt, sem er hlutfallslega minni en fullvirðismark svæðisins, skipt hlutfallslega á milli þeirra upp að fullvirðismarki.
- b) síðan skv. ákvæðum, 1.-4. tölulíðar 4. gr.
- c) til framleiðenda á búmarkssvæðinu, er lögðu inn sauðfjárafurðir umfram fullvirðisrétt sinn, þó aldrei meira en að búmarki þeirra.
- d) afgangi sem verða kann, skal varið til þess að fullvirðisréttur sem ráðstafað var skv. 9. gr. rg. nr. 445/1986 nemi 3% af samanlögðum fullvirðisrétti búmarkssvæðisins, svo og til að mæta fullvirðisrétti skv. 4. mgr. 2. gr. rg. nr. 157/1987.

7. gr.

Framleiðanda er heimilt að ráðstafa fullvirðisrétti jarðar og tilsvareandi búmarki til annars lögbýlis með samþykki viðkomandi búnaðarsambands, sbr. 6. gr. rg. nr. 291/1987. Tilkynning um ráðstöfun þessa studd samþykki búnaðarsambands og eigna viðkomandi lögbýla skal hafa borist Framleiðsluráði landbúnaðarins fyrir 1. júní 1989.

Þeim aðilum sem veittur var aukinn fullvirðisréttur samkv. 4. mgr. 2. gr. rg. nr. 157/1987 er óheimilt að ráðstafa honum á annan hátt en með eigin innleggi kindakjöts í afurðastöð. Nú nýtir framleiðandi ekki þennan fullvirðisrétt allan eða hluta hans, skal hinn ónýtti hluti fullvirðisréttarins þá falla niður á því ári.

8. gr.

Skerða skal fullvirðisrétt sem reiknast skv. ákvæðum þessa kafla, taki framleiðandi út ófryst kjöt og slátr úr afurðastöð umfram eftirfarandi mörk:

1. Framleiðandi á lögbýli getur tekið allt að 60 kg af ófrystu kjöti auk sláturs af eigin framleiðslu fyrir hvern heimilismann sem hafði þar lögheimili 1. desember 1988 skv. þjóðskrá.
2. Framleiðandi utan lögbýlis getur tekið allt að 60 kg af ófrystu kjöti auk sláturs af eigin framleiðslu.

Taki framleiðandi meira út en um getur í 1. og 2. tl. 1. mgr., skerðist fullvirðisréttur hans um það magn. Jafnframt skerðist heildarfullvirðisréttur til framleiðslu á kindakjöti sbr. 3. og 4. gr. um sama magn. Óheimilt er framleiðanda að taka kjöt úr afurðastöð eftir að það hefur verið fryst. Heimild til að taka út kjöt eftir ákvæðum þessarar greinar án þess að það skerði fullvirðisrétt viðkomandi framleiðanda, fellur niður hjá þeim aðilum sem slátra utan afurðastöðvar.

Afurðastöðvum er skylt að halda sérstaka skrá yfir allt heimtekið kjöt, þar sem fram koma allar sömu upplýsingar um innlagt kindakjöt. Skrár þessar skal senda Framleiðsluráði landbúnaðarins með sláturskýrslum. Skal það annast útreikninga er sýna breytingu fullvirðisréttar skv. reglum þessum og tilkynna það viðkomandi afurðastöð áður en fullnaðaruppgjör fer fram skv. 12. gr. Sláturleyfishafa er skylt að merkja allt kjöt sem tekið er út úr afurðastöð samkvæmt ákvæðum þessarar greinar, með stimpli sem á stendur HEIMTEKIÐ – EKKI-VERSLUNARVARA. Stimpla skal skrokka á sex stöðum alls. Hvorn helming skal stimpla á þremur stöðum, á bóg, hrygg og læri.

9. gr.

Við ábúendaskipti á lögbýlum skal samanlögð framleiðsla fráfarandi bónda og þess er við tekur teljast framleiðsla býlisins á viðkomandi verðlagsári.

Komi í ljós að framleiðsla býlisins skv. 1. mgr. þessarar greinar er umfram fullvirðisrétt býlisins, hefur fráfarandi bóndi rétt til að ráðstafa fullvirðisréttinum óskertum fram til ábúendaskipta nema öðru vísi sé um samið milli aðila.

III. KAFLI

Ýmis ákvæði.

10. gr.

Framleiðsluráð landbúnaðarins heldur skrá um fullvirðisrétt til framleiðslu sauðfjárafurða og breytir skrá um fullvirðisrétt og búmark í samræmi við samninga um sölu og/eða leigu á fullvirðisrétti sem staðfestir eru á grundvelli samnings, sbr. 7. gr.

Framleiðsluráð landbúnaðarins aflar upplýsinga vegna framkvæmdar þessarar reglugerðar og annast eftirlit með uppgjöri afurðastöðva við framleiðendur.

Afurðastöðvum er skylt að láta Framleiðsluráði landbúnaðarins í té allar þær upplýsingar sem að gagni geta komið við störf þess og þær geta veitt.

11. gr.

Framleiðsluráð landbúnaðarins tilkynnir hlutaðeigandi sláturleyfishöfum fullvirðisrétt framleiðenda eigi síðar en 10. desember 1989.

Frumgreiðsla fyrir sauðfjárafurðir skv. 1. tl. 29. gr. 1. nr. 46/1985 skal miðuð við fullvirðisrétt hlutaðeigandi framleiðanda skv. 3. gr., sbr. þó 1. mgr. 6. gr.

Fullnaðargreiðsla og viðbótargreiðsla skv. 2. og 3. tl. 29. gr. áðurnefndra laga skulu miðast við endanlegan fullvirðisrétt framleiðanda til framleiðslu sauðfjárafurða skv. þessari reglugerð.

12. gr.

Framleiðsluráð landbúnaðarins skal tilkynna framleiðendum fullvirðisrétt þeirra. Þeir eiga þess kost að gera athugasemdir við hann og skulu þær berast Framleiðsluráði landbúnaðarins innan 30 daga frá birtingu tilkynningar um endanlegan fullvirðisrétt, ella gildir hann fyrir verðlagsárið. Framleiðsluráð landbúnaðarins endurskoðar útreikninga, sem athugasemdir eru gerðar við og tilkynnir framleiðanda niðurstöðu sína.

Berist framleiðsluráði ekki athugasemdir við þá niðurstöðu innan 25 daga frá dagsetningu úrskurðarins, gildir hún fyrir hlutaðeigandi verðlagsár.

Uni viðkomandi framleiðandi ekki þeirri niðurstöðu, hefur hann rétt til þess að skjóta ágreiningnum með rökstuddri kæru til nefndar, sem skipuð er skv. 31. gr. 1. nr. 46/1985. Skal nefndin fella úrskurð sinn innan 30 daga frá því erindi berst henni.

13. gr.

Brot á reglugerð þessari varða viðurlögum samkvæmt 59. gr. laga nr. 46 27. júní 1985 um framleiðslu, verðlagningu og sölu á búvörum. Með mál út af brotum skal fara að hætti opinberra mála.

14. gr.

Reglugerð þessi er sett skv. lögum nr. 46 27. júní 1985 um framleiðslu, verðlagningu og sölu á búvörum og öðlast gildi þegar í stað.

Landbúnaðarráðuneytið, 15. september 1988.

Jón Helgason.

Jón Höskuldsson.